

廣州人物傳

廣州人物傳卷第十一

嶺南遺書

香山黃佐才伯撰

東莞伯何公

貞德

都轉運使劉公

德

知縣簡公

祖英

吏部尙書張公

度

試工部尙書麥公

志德

戶部侍郎黎公

光

參政彭公

通

何真字邦佐東莞之員岡人少英偉好書劍元至正中仕
爲河源務副使淡水鹽場管勾時中原兵起嶺海騷動

棄官歸鄉里慨然以生民爲念邑民王成陳仲玉搆亂
眞請於行省舉義兵除之無何惠州人王仲剛與叛將
黃常據惠貪暴肆欲民不堪命衆慕眞義迎以守惠遂
解惠州之困逐常戮仲剛併有惠循二州行省論功授
惠州府判尋遷惠陽路同知廣東都元帥歲癸卯南海
三山民邵宗愚陷廣州守將何深死之大肆焚掠眞聞
之率衆復其城號令明肅廣人大悅擢廣東分省參政
進江西等處行中書省左丞階資善大夫分省治廣弟
迪以從征功擢中奉大夫廣東道宣慰使都元帥兼僉
樞密院事遂推恩二代祖發藻贈中奉大夫廣東道宣
慰使都元帥護軍追封廬江郡公父叔賢贈資善大夫

江浙等處行中書省左丞上護軍追封廬江郡公祖妣鄒氏母葉氏皆廬江郡夫人未幾合江西福建爲一省改拜資德大夫江西福建行中書省左丞仍治廣州乙巳九月宗愚挾廉訪副使廣寧等叛圍廣眞禦之踰十月部將與賊通絕糧道眞出避城陷丁未五月眞帥惠州部曲至廣民響應復克之宗愚退走誘右丞鐵里迷失以歸明年制授眞榮祿大夫自左丞遷右丞洪武元年二月壬寅朔太祖命廖永忠爲征南將軍率舟師取廣東時永忠在福州卽先遣人以書諭眞略曰元君失馭天下土崩豪傑之士乘時而起或假元之號令或自擅其兵威暴征橫斂蠶食一方生民塗炭可謂極矣今

天子受天明命肇造區夏江漢旣已底定閩越又皆帖服中原之地相繼以平惟兩廣僻在遐荒未沾聖化予受命南征順者撫綏逆者誅殛恐足下未悟輒先遣一介之使相告惟足下畱意焉遂航海趨廣東三月壬辰師至潮州眞遣都事劉克佐詣軍門上其印章己亥復籍所部郡縣戶口兵馬錢糧遣使奉表降永忠遣人送其使及表詣京師太祖賜詔褒之曰自元綱解組羣雄並爭天下瓜分未見定於一者朕舉兵濠梁創基金陵除殘去暴十有四年邇者遣將四征所向克捷撫有七閩肅清齊魯廣西之師相繼奏捷大將軍提兵北伐中原指日可定朕思昔豪傑之士保境安民以待有德若

竇融李勣擁兵據險角立於羣雄之間非眞主不屈此
漢唐名臣於今未見正此興歎爾眞連數郡之衆乃不
勞師旅先期來歸其視竇李奚讓焉今特驛召來廷錫
爾名爵以旌有德於戲天厭紛紜人思平治爾之所舉
實惟知時堅乃初誠以懋乃績四月永忠至東莞眞率
官屬出見永忠慰諭之仍以榜招降諸寨誅邵宗愚等
餘孽悉平詔至眞乘傳入朝太祖授眞中奉大夫江西
等處行中書省參知政事諭之曰天下紛爭所謂豪傑
有三易亂爲治者上也保民達變識所歸者次也負固
偷安流毒生民身死不悔斯不足論矣頃者師臨閩越
卿卽輸誠來歸不煩一旅之力使兵不血刃民庶安堵

可謂識時達變者矣真叩頭謝曰昔武王伐暴救民諸侯不期而會者八百今主上除亂以安天下天命人歸四海景從臣本蠻邦之人始者逢亂不過結聚鄉民爲保生之計實無他志今幸遇大明麗天無幽不燭臣愚豈敢上違天命太祖曰夫能不賈禍於生靈者必世享其澤朕嘉卿忠誠念江西地近廣東用特授爾江西行省參政以表來歸之誠古云令名德之興也卿令名已著尙懋脩厥德以輔我國家真蒞官有德有威施政發令風行霆斷人莫敢犯而一主於寬厚尤好儒術平居讀書綴文無虛時三年移山東行省尋定官制改四川布政使所至有聲越七年以老致其政二十年八月封

東莞伯食祿一千五百石賜以鐵券本身免二死子免一死祿及世世二十一年三月眞薨年七十御賜葬祭子榮襲封東莞伯榮字耀先後以羅罪褫爵次貴字奉先有學行爲士大夫所推重次宏字彥先官至尚寶司

丞

用廣州志皇明文衡
開國功臣錄參修

劉德其先眞定人祖宦遊嶺表家於四會元末避兵新會依主簿徐文可共保縣治後黃斌以逆兵來攻邑城失守聞北到甲林文秀獨能固守德與衆就之鄰境避亂者咸往依焉時元太常卿余觀國招撫江南惟北到一甲尙爲國守咨嗟太息因命其鄉曰崇節以示褒重焉德稟性剛直復勇健善戰至洪武初年天兵至德往見

征南將軍廖永忠遂薦之於朝授陝西鞏昌府通判陞
臨洮府同知湖廣襄陽府知府福建都轉運使洪武十
三年引年卒於家又區禹民者南海之龍津人也性剛
直爲鄉人信服元季土豪相聚爲亂禹民偕其族子忠
吉體原率衆立砦保障鄉人賴之洪武初廖永忠師下
廣州禹民等首請歸附永忠令保障如初副將軍參政
朱亮祖陷於山南賊忠走告永忠調軍令忠等爲向導
破之亮祖圍解事平禹民等入朝詔以禹民知汀州府
以資高辭更授仁風鎮巡檢吉授彰德衛百戶忠與體
原不仕而還

用廣州志新會
志順德志參修

簡祖英字世英東莞人學問該博且有才畧事元爲江西

都省員外又從左丞何真起兵保護鄉邑贊畫平邵宗
愚之功居多廖永忠克服廣東乃徵祖英赴闕錫燕勞
之資以纁帛拜建平縣知縣以母辭歸其陳情表略曰
臣祖英九歲失怙惟慈親鞠育逮長知訓冀或用世以
酬罔極之恩臣之志也向以叨食元祿爲何左丞參佐
適值三山強寇剽掠廣城一門妻女死節五人而老母
陳氏爲所拘囚臣祖英隱忍不能卽死其有愧於石苞
之殉國也多矣茲遇聖朝維新征討不服率土效順咸
蒙嘉休乃者三山逆虜悉嬰鐵鎖臣母得以生還雖臣
祖英不孝之罪固所難逃而得以展區區羝鳥情私者
陛下之賜也臣母子離散復完白骨復肉銘感聖德徹

於肝肺雖九死其能報耶陛下又復甄錄寄以民社此正臣隕首思效之秋也而臣俛顧自慙不敢拜命者以罪戾已深不宜職在民牧欽惟聖朝以孝道治天下祿秩不容及不孝之徒以仁心懷遠人而匹夫無不獲之願況臣經事元朝幸已逃誅母年逾耄孤苦特甚尤宜惻怛而欽恤者也伏望聖慈收回成命矜其愛日之短俾遂歸養之願則臣母子拭目清平謳歌德澤爲賜也多矣今臣年四十有九老母年八十有一鶴髮垂堂西山之日已薄棄親赴任不孝之罪益深苟違親而事主陛下安所用之果盡奉歡之期然後復求仕進以盡忠罄節非惟遂人子之私亦聖朝孝理之道也上俯從之

人榮祖英之能養焉時上方以道德風厲天下凡元朝
飯降之臣始雖榮遇終必擯辱名士如危素張以寧輩
皆所不免蓋亦漢祖戮丁公之意云爾祖英之見卓哉
又有高彬者字文質南海人何真部曲也仕元至萬戶
佩金虎符入國朝乃走江湖爲巨賈徵爲武職固辭久
之把筆學爲詩有奇語孫贊稱之晚年日坐一小樓讀
易不知其身之老也號蟾溪云

用廣州志西
庵集參修

張度字景儀增城人風儀偉特未冠時有相者見之曰山
角淵庭柱石材也以才學聞元季舉茂才爲高要縣學
教諭遭亂棄官歸杜門讀書而業益進洪武壬子登科
第擢監察御史陞常州府知府吏部左右侍郎進吏部

尚書譽望爲時所推仰其爲御史也彈駁不避權要高
皇帝重之命領蘇州守魏觀所爲不法度稱日者入吳
縣學宮廉得其實還奏稱旨嘗建議立張巡許遠廟於
歸德州以勸忠上亟命有司舉行焉時諸勛臣連姻帝
室多怙勢者度每事檢舉風采凜然朝署爲之屏迹其
出守常郡也治政公勤人不敢干以私雖公務倥傯不
廢文業勸勉郡人俾知向學禮教藹然大興前郡守何
用修公廨建庠序祠宇未畢以罪去度力終其事而民
不以爲病治行爲畿輔第一朝廷聞其能召之遂大拜
其爲侍郎也嘗條舉選法之不當者數十事上之皆見
用居法從六年從例贈其父復禮承事郎吏部侍郎母

林氏德人其爲尙書也藻鑑人品銓選得體持廉秉公
朝野欽之後以小誤當獲微譴閉戶一晌憤惋卒人皆
傷之度爲人清謹持大體鄉人尊之以爲有崔清獻流
風云始度本番禺人番禺有鄉曰黃岐角皆張姓環居
之室廬櫛比燈火連接而讀書之聲相聞宋紹興間有
諱堯者始遷於禮園社堯生飛一通周易能會萃諸家
之說而折衷之廣之士大夫推爲宗師號曰黃岐張氏
易二子彬甫鄰甫皆善傳父經彬甫生復禮於易學尤
精發爲大義頃刻千餘言出入程朱二氏無乖盭者漢
儒拘泥不通或流於術數痛麾斥之學成不求仕念居
村疇諸子見聞孤陋乃築室城都中俾就名儒游見其

能立輒喜動顏色度以是成名復禮沒度葬之增城之

西之章山因遷家焉度之弟峻熙輩亦以學業聞子姓

至今不絕

用廣州志一統志
宋學士文集參修

贊曰余少時則聞增江張冢宰之賢父老爲余言國初
馭下多從重典藩臬守令稍有賊罪懷印未煖卽逮之
去非遠戍則門誅其有異政者不浹旬已位朱紫矣以
故居職惴惴惟恐不能奉法卹民以忝榮祿由中迄外
百職釐舉張度守常時朝廷方遣使逮京甸諸郡守使
者道經常常人相傳以爲捕度也度方燕食聞之笑曰
張度盡心民事必不見逮萬一有之吾官爲大夫有死
而已必不受獄吏辱已而果非捕度未幾入召矣其後

竟死於職其賈生所謂聞命而自弛上不使人頸轡而加者歟噫亦可謂大臣矣在朝建白最多惜其家無傳焉

麥志德連州連山人少勤學有才幹洪武初以孝弟力田舉上奇其謀略拜五府斷事累遷右參軍洪武十七年正月擢工部侍郎試本部尙書明年坐戶部侍郎郭桓所累志德與闔部皆置於法或勸其詣上自明志德不敢也

用連山志修

黎光字仲輝東莞人博學能文倜儻有奇氣洪武壬子膺鄉薦釋褐拜監察御史正色立朝卓有風裁常巡歷蘇州民罹水災缺食具實以聞得蒙賑濟存活者甚眾及

巡歷鳳陽所上封事皆切時弊遂受知於上其在朝也
執法不阿爲御史大夫陳寧所忌陞刑部侍郎纔三閱
月陳以他事中之竟卒於謫所人皆惜之其父伯原元
季由連山教諭歷德慶惠陽二郡庠教授所至學者尊
之文風以振有漁唱藁傳於時然則光之學行才識實
異於人者蓋得家庭之學云

用東莞志修

彭通字萬里南海人蚤失怙恃勵志讀書工爲詩隱居教
授從之遊者常數百人洪武四年由儒士舉銓部以召
入見上親閱之拜給事中參劾封駁嚴公有威同列皆
以爲勝己時上方嚮文學多擢近侍寘左右俾應制焉
通詩思敏給上稱之嘗賜贊善大夫宋濂以醉學士歌

通預賡和之列九年三月與方徵等十六人偕轉監察御史嘗奉命巡京郡薦達賢能攻擊貪暴有能聲用事者遣人齎金帛賂之通辭不可其人強之受通欲以上聞乃已久之陞山西布政司參政通單車赴任能以公恕滌積弊河東運司官匿羨餘不以實聞廉得其情遂寘於法朝廷賜寶鏐旌之有吳印者官至陝西方面本五臺寺僧也以材辯受上知嘗譖殺按察僉事張丁其家人橫肆諸藩臬事之唯謹偶以事干通通直其罪且斥辱之條其事以聞上不之罪也尋引年致仕卒於家通爲人恭謹外柔而中實剛直爲政若不事徼察者然所舉刺動無遺失故能以功名終同通時爲監察御史

者有南海鄭毅亦名士也毅字德宏洪武庚戌進士嘗
按八閩以清直稱才思敏贍世言能詩者必曰鄭御史

云

用南海志修

廣州人物傳卷第十二

嶺南遺書

香山黃佐才伯撰

前翰林典籍孫公黃

給事中王公佐

前翰林待制黃公哲

教諭李公德

贈監察御史趙公介

孫黃字仲衍南海之平步人也性敏邁資表秀偉於書無所不讀爲詩文多不屬藁開卷伸紙立筆而就初若不甚經意而氣象雄渾興喻深致駿駿乎魏晉之風自少負節槩不妄交耕夫販婦望而目之曰孫先生元季避

亂山澤間東莞何真保有南海洪武改元戊申征南將軍平章廖永忠至真求贊作書請歸附曲盡誠款永忠不戮一人而南海帖然者贊之力也永忠尋徵贊典郡教三年庚戌始詔天下設科取士贊以詩經中高選會試中書入對大廷皆在前列賜進士出身授工部織染局使尋出主虹縣簿時經兵燹十室九空加意勞來民還其業甫一載被選入爲翰林典籍學士宋濂樂韶鳳承旨詹同亟稱許之日侍上左右奏對敏便而容觀飄逸濂輩皆自以爲莫及八年預脩洪武正韻九年以奉常之節監祀於西川居翰林三載力求補外爲平原簿無何以事逮繫有旨輸左校板築蕭牆望都門謳吟爲

粵聲督工者以聞召至上前陳所作詩皆忠愛語特命
釋之十一年罷歸田里放迹雲林中益肆力於問學所
見益深有輕死生齊物我之意嘗和陶潛歸去來辭以
寫其情其一曰懷靈荃志不忘君也十五年被召拜蘇
州府經歷蘇爲東吳劇郡素號難治蕢蕢畫有方政用
大和二十二年以事謫戍遼東怡然就道酌酒賦詩無
異平日時都帥梅思祖節鎮三韓素聞蕢名迎置家塾
是年竟以黨禍見殺人皆勸其以疏自明蕢不答歌一
詩長嘯以就刑天下冤之年五十有六門人黎貞時亦
在戍奉柩葬於安山之陽蕢平生誤述甚富有通鑑前
編綱目七卷孝經集善一卷理學訓蒙一卷西庵集八

卷和陶集一卷集古句律詩一卷傳於學者孝經集善則宋濂爲之序焉蕢旣沒諸書多零落弗存其詩文今行世者爲黎貞所編番禺趙絢作蕢傳稱其究天人性命之理濂洛關閩之學爲嶺表儒宗官雖不甚顯而所至有聲出處窮達夷險一致云

用西庵集順德志參修

王佐字彥舉家世本河東元末侍父官南雄經亂不能返因奉母寓廣州改物後占籍南海時孫蕢與佐結詩社於南園開抗風軒以延一時名士佐才思雄渾體裁甚工蕢深重之構辭敏捷王不如孫句意沉著孫不如王會何真開署求士與蕢首被禮聘真敬二人者使掌書記軍旅事多見咨詢李質者德慶豪帥也據有肇慶佐

恐其有異志與質往說之得其歡心質遂與真通好然
質尤號好文義衣冠之士多往依之其尤知名者則有
江右伯顏子中茶陵劉三吾建安張智歸言於真使招
致之由此士皆館穀凡以一藝名者真不棄也洪武六
年部使者薦於朝謂佐有才學當備顧問徵至京師拜
給事中論思補闕恆稱上意學士宋濂嘗拜賜黃馬上
爲歌命諸詞臣和之佐斯須而就清新富贍如宿構者
有臣騎黃馬當赤心之句上覽之而喜賜鈔一錠上遊
幸或遇會心處多命之賦詩三吾嘗同詠署中桂驚其
才高語妙以爲名世之作其爲名流所重如此佐性不
樂樞要居官二載卽乞骸骨上憐其誠特俞所請陞辭

日賜鈔五十千以爲道路費士林羨之時天威嚴重臣僚自陳者多被譴斥蓋十人而九佐以恭慎得歸故當時以爲難云佐天性孝悌父沒時有廖元正者爲料理喪事殯諸南雄之五里山終身事元正如父旣貴後元正之子犯法言於有司以已貲贖其罪哀慕終身形於著述有聽雨軒集瀛洲集多散逸郡人彭森刻於建安者僅詩一卷評者比之高適岑參

用楊詩夫趙絢所撰集序參修

黃哲字庸之番禺人世爲荔灣著姓哲弱冠而孤刻苦讀書通五經嘗借人文選手鈔之沉玩究竟遂能作詩造晉唐奧域性好山水結廬蒲澗栖息其中往來羅浮峽山南華諸名勝自以爲未足乃辭家度庾嶺過吳楚遊

燕齊間一時湖海英豪皆與遊焉當風雪時泊舟秦淮
遇朱文昭涂穎輩相與握手吟咏沽酒大噱二人喈曰
君才如白雪吾雖知音如寡和何自是益有名龍鳳中
太祖爲吳王駐師金陵招徠名儒哲爲丞相李善長參
政張昶汪廣洋所知交薦之乙巳建吳國拜哲翰林待
制入書閣侍太子讀書尋兼翰林典籤輔導盡職太子
愛重之鈔幣之賜無虛日丙午六月左丞相徐達北伐
捷聞上命賦詩稱旨未幾歲早上祈雨鍾山獲應御製
七言詩志喜命哲賡之其見重如此洪武初奉使青徐
諭諸反側尋出知山東東阿縣蒞任勤於爲政吏胥初
以儒士易之哲剖決如流案牘無停者且不事繳繞苛

察民樂其寬一縣帖服值旱麥苗盡彫乃齋戒徒跣烈日中詣洪範池之龍祠禱焉詞旨哀惻甘澍應時優渥民驩呼曰此黃公雨也狼溪有怪物善爲幻能竊人啗之哲爲文禱於天須臾風雷大作一青蛟斃水上邑人訝以爲通神時經毛貴亂後民多流徙他邦聞哲善政復其業者亡慮數千人戶口日滋辛亥四月陞東平府通判東阿士民遮道涕泣攀畱父老扛輿而至有百餘歲者抵府境乃返是歲黃河決梁山中國書省發民疏浚哲董東平之役經畫有方民不告勞聞有司欲復堰黃陵岡哲建議謂此乃胡元之覆轍可以爲戒不可以爲法事遂寢尋上疏陳時務數十事皆人所難言上怒其

狂斐會山東分省奏哲捐俸修先聖祠築積水湖堤有
成績上乃釋不問哲亦乞歸得允既南還有司請哲領
郡校事橫經授徒四方至者多名士歲凡數百人乙卯
四月朝廷取回山東治在郡註誤竟置於法郡邑人爭
賄之且家爲奠祭哲始北上時倚蓬聽雪常自詫曰天
下奇音妙韻出自然者莫是過也歸構一軒名聽雪蓬
學者稱曰雪蓬先生子德輿輯其詩文十餘卷號雪蓬
集行於世嘗經梁昭明太子墓作詩弔之評者謂置選
詩中殆不可甲乙其精工如此

用琴軒集雪蓬集參修

李德字仲修番禺人博覽羣籍工文詞尤邃於經學明毛
詩尚書洪武庚戌以明尚書薦至京師上親策問賜徐

大全等出身有差德預焉授洛陽縣典史繼遷濟南西
安二郡幕非其好也政暇遍覽帝王遺墟登高作賦發
其胸中磊落之氣人爭傳誦嘗著論謂西安南陽皆天
下大形勝所在建不拔之基者當擇而都之江東非其
匹也士林韙其識歷職郡邑十餘年年薄暮矣乃自陳
不能吏願就敎官得爲湖廣漢陽敎諭當兵革初靜養
舍翳蓬蘿中生徒僅十數輩皆野獷不可與語德盡心
訓迪之言諸有司羅致民間子弟之俊穎者館穀焉自
是絃誦誦誦人知向學矣秩滿改任廣西義寧縣學其
俗尤陋德立法凡遇家有吉凶事當告假者隨貧富以
楮幣賙之孜孜勤諭使約束鄉鄰不得爲惡習俗日美

科貢漸盛當道方薦達之而德以倦遊南歸卒於家德爲詩多效長吉太白孫蕢笑之曰子真混元皇帝遠孫也德乃力追古作有易庵集行於時序者以爲跨晉唐而躐宋元云少嘗自號采真子著論如子書晚更潛心伊洛故世稱有理學者必曰李長史子孚字底信亦能

詩

用廣州志文翰類選大成易庵集參修

趙介字伯貞番禺人博通六籍雖星官醫卜之說浮屠老子之書靡所不究氣宇豪邁與物無芥蒞興到卽揮毫賦詩人莫測其涯也父璟元臨江路治中與母連喪介孤憤閉戶讀書遂無復仕進意植二松於所居扁其軒曰臨清蓋以淵明自擬昭其志云時有李韓者南海文

士也以薦起介力止之不可臨別介泣謂曰堯天雖長
劉日實短子獨不爲高堂念乎讎竟去後倅南康坐累
乃歎曰趙伯貞真高士也介行嘗以一囊自隨遇景卽
投詩其中絕不爲人畱題縉紳恆病其狷性復不喜接
達官貴人日往還西樵泉石間獨與八十翁劉樂善者
相倡和以自娛屢爲有司所薦皆苦辭免洪武己巳以
家累有旨逮赴京師道南昌卒於舟中年四十六介顏
如渥丹丰度類神仙中人尤善教子四子絜絢繹純皆
善詩文工篆隸時稱四懷絢亦隱居有父風所謂趙懷
絜者也後純貴贈介爲監察御史有臨清集行於世方
孫贊王佐結詩社南園時一時名士如李德黃哲暨別

駕黃楚金徵士蔡養晦黃希貢長史黃希文架閣蒲子
文進士黃原善趙安中安中之弟通判澄徵士訥皆與
焉豪吟劇飲更唱迭和文士宗之而介自成一家言世
以贊佐德哲並之稱五先生云李韓字或華與介齊名
有夷白集而今不傳

用五先生集趙氏家譜陳璉所撰碑參修

廣州人物傳卷第十二

廣州人物傳卷第十三

嶺南遺書

香山黃佐才伯撰

稊坡先生黎公

貞

教授廖公

謹

吏部主事鄧公

林

樂澹先生唐公

豫

學圃先生黃公

勣

刑部郎中黃公

裳

教諭黎公

秉紗

黎貞字彥晦新會人性坦蕩不羈樂以酒自放故號陶陶生晚更號稊坡學者稱之曰稊坡先生貞自少岐嶷異

羣兒七八歲時與弟浴於塘弟溺塘井中雙指猶漾漾未沒貞亟沒水以手捉其足登淺處鄉間異之五羊孫黃狂者才美絕人爲文章操筆立就死生榮辱得失一不以介意貞從之游故學所成就非一時流輩所及發而爲詩文滔滔白胸中寫出無斧鑿痕議論古今治亂興廢與世道得失人物賢否類出於已意而多得之洪武初補郡庠生部使者以其有學行署爲新會縣學訓導志不樂仕乃退築釣魚臺於所居宅前自擬嚴光後以事爲訟者所誣發戍遼東者十八年艱危困阨之中學愈博而識趣愈高氣愈充而議論愈出比脫伍歸聲聞益著學者從之遠近畢至貞諄諄善誘每俯而就之

隨其淺深有所造就焉嘗自贊其像曰江湖勝覽渤海
浪遊飄飄一葉浩蕩沉浮惟酒是務陶陶忘憂譬彼力
穡乃亦有秋不知老之將至樂夫天命死卽休年五十
九卒所著有稊坡集古今一覽家禮舉要行於世初貞
在遼時孫贇以事死貞抱持其尸以衣裹之殯殮如禮
奉柩葬於安山之陽典衣營其事爲文祭之讀者莫不
墮淚其篤於友義如此比其自遼歸也適已薄暮明月
滿空呼舟中餘酒登所築釣魚臺吟嘯久之乃扣門還
家焉其胸次脫落此類也

用新會志廣州志西庵集參修

廖謹字慎初南海之葛岸人恬靜力學凡經史百家之書
靡不淹貫不妄交游以澹交名其齋永樂中學士解縉

出爲交趾參議嘗遇謹與之上下其論若繭絲炙轂出
出不窮縉不能有加也亟以名儒稱之爲謹題西樵讀
書處有曰反身循理懲忿窒欲敬之敬之如金如玉稷
契皐陶何書可讀蓋以聖賢事業期之也當是時讀書
山中名聞公府識與不識皆曰廖五經廖五經云以明
經舉爲四會訓導後轉通山教諭以教績著聞性樸實
不能諛上官人或以俚語笑之爲古必謂泥古不通也
乃作古必解以自嘲其文曰有孤魯先生與結吉先生
同遊於廣漠之野衣大博之衣冠章甫之冠昂昂然飄
飄然若遠去世俗而人莫知之者有方外之客適邂逅
焉始而睨之中而隨之終則逼而近之曰先生之遊何

樂乎結吉先生呀然歎曰子豈能知我邪子之遊自樂
子之樂耳復又何求客乃揖而前曰夫知進而不知退
者非禮也知方而不知圓者非智也知易而不知險者
非識機者也知有已而不知有人者非識時者也今先
生博極經史而莫適其逢出入仁義而莫收其功周情
孔思千態萬狀而莫變其通獨不見今之人乎不以其
文而惟其人不以其仁而惟其親不以其直而惟其順
若先生也久典泮芹寂寂其身名不爲顯行其孰聞德
不見施孰知爾真乃不知此徒大言於斯文曷亦自反
遂以更新不古則必乃以我爲嗔邪孤魯先生乃輟爾
答曰君子之於所知也則當有言其所不知則當闕而

不宜汝談何易曷知其然夫君子進退義爲周旋方圓
易險中而不偏萬變曲折正以行權若乃肆口騰舌翻
雲覆雨隨圓不方趑趄旁午此乃狂狎小人之行豈君
子正大之矩也邪故寧不合而不詭隨寧不用而不以
諂爲動循禮則惟古人是師不世不俗惟古人是期昔
在元聖其仕其止惟義是宜惟久惟速惟禮是依其非
不智也而或致喪家之譏其非無禮也而或致諂君之
非人之莫知也而於聖德容又何虧故能垂教萬世與
日月而同輝若予也少頗讀書長遊鄉校友二明師亦
以明道髮燥吹風卽此是好由西而南忝爲人教學不
如人功亦克造智則不足而禮不踰因機與時亦頗不

愚若乃隨時俯仰低昂以趨行而趨起口而嚙嚙則又與古人殊也假因諂以致浮譽貿魚目以混明珠吾則山石可攻而心難移是宜乎人之不我與歟然此心亦古人之心則其人亦古人之徒也茲願愛古必之劣而不願詭隨阿曲以諛使有識者吾將質而問諸彼大方者其將以予言爲何如客旣就去先生亦返乎所居之庭除久之陞南安府學教授致仕卒其教人以執禮爲先羣從兄弟嘗受學者終身莫敢與雁行立從子恂宣德癸丑進士至通顯事謹猶執服役人以是高之所著有澹交集藏於家

用澹交集廣
州志參修

鄧林字士齊新會人能爲古文章洪武丙子以明經中鄉

選歷貴縣南昌教職遷吏部驗封稽勲二司主事林嘗
自謂其學詩於陶韋李杜學文於史漢韓柳學書於晉
唐諸名家初無所知名作懷春賦以寄意曰方春陽之
和煦兮萬物育而熙熙何使予之不樂兮獨惆悵而歔
歔思抑鬱其若絨兮言可結而詒詒閼深閨而悒嘿兮
焉知予之所懷女生而願有家兮及嫵婉於良時時與
願而兩睽兮豈予德之有虧以保傅之愛助兮幸無非
而無儀辨貞慎以爲顰兮節禮義以爲綦陳女圖以爲
鏡兮鑑在彼之妍媸不外炫其姣服兮矧自揚其娥眉
吾有此娉節兮諒君子之攸宜申予好以元纁兮亦旣
差穀而結纁指初昏以爲期兮胡申旦而改違德無虧

而見擇兮俛顧懷而靜思豈導言之不固兮致兩美之
參差將其志有緯繡兮非蹇修所能媒感標梅之在筐
兮欲自往而謂之念伐柯之匪斧兮懇相鼠之貽譏不
由禮而汲汲兮固非予之所知時忽忽其不淹兮亦恐
繁華之不滋心昧昧而莫喻兮假筵簞以決疑靈氛告
予以吉兮曰貞固之可持雖佳期之非真兮孰求美而
釋茲節余情而不傷兮聊撫景而娛娛步逍遙而容與
兮玩衆芳於畹畦崇蘭汎乎光風兮竟芳菲而襲衣顧
申椒與若蕙兮謂結車與江蘼荃好修而有取兮終必
充夫佩韋曼余目於遠道兮望軒車之載馳冀芳菲之
未歇兮及公子以同歸辭曰有美一人清揚姱兮綵綵

嬋娟惟靈修之故兮芳春永懷無使歎夫遲暮兮後官
於朝大學士楊士奇祭酒李時勉閱其詩文曰嶺南一
代文人也其他詩詞序記銘贊之屬皆隳括有法自號
退庵所著有退庵集行於世同邑有梁臨仲敬者羅蒙
正高第弟子也英華秀發工詩文而長於舉業蒙正稱
之洪武庚戌薦於鄉辛亥登進士第賜燕中書堂賦詩
有鼓腹愧蒙天澤溥願推餘滴遺烝民之句一時翕然
稱之歷永城縣丞禮部主事卒又有番禺何子海百川
者臨同年也本宋進士起隆之後博學能詩嘗擬秋風
三疊清婉沉蔚評者以爲過居實遠甚歷丞睢寧永康
二縣而官不顯二人者皆先鄧林時又有番禺二黃則

名在林之後伯曰隱字宗志永樂甲午鄉薦金谿訓道
仲曰匡字宗輔丁酉鄉薦萬載教諭陞貴州道監察御
史俱能詩而匡尤善草書隸篆其父珣字伯琪洪武甲
子鄉薦吉水教諭亦能詩世謂二董爲克肖子有二董
集及自見集藏於家云

用廣州志新會
志退庵集參修

唐豫字用之南海之平步人父奎字景文洪武初鄉貢授
增城縣學教諭博洽羣書鄉人號爲唐書櫃有龜峯集
傳於時豫生而穎悟少從翰林典籍孫蕢遊作詩文有
古人風度性剛介無諂曲交友克盡義尤篤於孝作蓼
莪亭以寓孝思主事劉履爲之記以古孝子不能過稱
之自號樂澹學者稱爲樂澹先生時有平步六逸謂東

臯周祖生南軒周祖念節庵劉子羽芸庵何淮素庵劉子高及豫也皆德行尊嚴衣冠嚴肅爲世所欽嘗相與定鄉約鄉人信守行之其所爲約曰嘗讀藍田呂氏鄉約千載而下藹然仁厚之風尙使人興起余等幸爲太平之民可無一言以爲鄉閭規範乎因立爲約與鄉人守之庶存古人風致之萬一也其一曰供納稅糧民之職也收成後卽便輸納庶使役人無違期之愆而鄉里有守法之譽諺不云乎若要寬先了官其二曰補解軍役必審其少壯當行之人不得受私瞞官恐招罪咎戒之戒之其三曰冠禮當依文公所制行之庶見習俗之美其謝賓束帛不必如古人之數飲燕之物不必過於

華盛財有餘者自當如儀其四曰婚禮舊俗先一夕燕其子子必據尊席而坐以爲漸老之宴殊非禮也今後止許設筵聚親子不當據尊席而坐爲父當依醮禮命之庶不違古人之意其五曰禮曰父在子雖老猶立今後爲子者不許坐違者叱以辱之其六曰父母之喪不得飲宴遠方親朋來弔亦待以蔬素朔望止設饌一桌奠畢親朋止茶湯而退其七日四時祭祀稱家有無須及時爲之忌日之祭當以喪禮處之讀祝後孝子哭盡哀是日不飲酒食肉居宿於外傳所謂君子有終身之喪是也其請親賓散胙必待祭畢而後令人相邀庶不分其祭祀之誠意親朋一請必至無待再三也其八曰

禮重往來古之道也而冠婚喪葬又事之大者鄰里親朋互相輔助不可有失如此則鄉里和氣自藹然矣其九日子弟當以讀書學問爲務孝於父母悌於兄長和於親族鄉黨其衣冠必須嚴雅不得過於華麗若有賭博破家花酒無度者爲父兄當禁之勿使其至於大惡傳曰愛之能勿勞乎念之其十曰居處相接當以十家爲甲其出入務相周知或有出入不明衆必體察之倘爲不善卽呈於官庶免其累已上所言余等當先力行之不可徒責人而忘自責也苟或如此則余等爲徒言矣蓋因鄉閭所易曉者而裁制之使簡易可循也行之一年爭訟蔑息久之頽俗漸革一時公卿間皆尊

重豫布政參議陳贊懿其文行待以賓禮且贈以詩有
百鳥羣中孤鳳凰之喻及贊改太常少卿去執手泣別
不能舍謂曰卿吾三益也其忍一日違卿邪子璧亦有
文行酷類其父築主一齋遠近尊師之每訓誘子弟必
使端立正坐出人規矩然後授以句讀或尤其迂濶曰
文藝末事耳苟不收其放心其何以爲受教之地邪正
統已巳之亂避寇佛山爲其鄉人畫策賊不能入皆有

集藏於家

用廣州志順
德志參修

黃勛字敏功東莞人博極羣書爲文奔騰雄放出入經史
有古作者意元季避地邑之白濠雖在擾攘中持志益
堅無書披閱則假事文類聚與兄默手自抄錄風寒暑

雨不倦其勵志如此洪武中以薦授邑庠訓導後改梧州二庠士子後多顯融者世稱其善教致仕卒於家學者因其別號稱之曰學圃先生子受益字虛已世其文學善於詞賦尤長於古文開門授徒擔簦負笈者戶外常滿都御史盧祥副使鄭敬輩皆出其門雅志不喜仕永樂庚子有司強之入試果以春秋中選遂隱居不出年五十五卒有文集十二卷諸子皆業儒次子結最知名結字資友領鄉薦就天河教諭居僻陋益肆力於書史陞泉郡教授兩主鄉試有樞要家以白金五百兩爲其子關節且許保薦爲御史結斥絕之泉人久廢於學結嚴立科條士皆激發科第自是驟盛復擇生徒之穎

敏者數人授以春秋後皆得雋泉中始有春秋之學矣
九載赴銓曹考爲天下教官學行第一陞遼府右長史
多所規諫王稍疏之久乃知其賢後丁內艱起復轉岷
府而卒所著有雲崑集

用廣州志雲
崑集參修

黃裳字迪吉番禺人少從李韓游明經學善文詞洪武癸
酉鄉貢進士卒業太學授福建政和知縣永樂初縣病
荒歉裳勸富民發私粟以借饑民而官置簿書條其人
名以印鈐之授諸富民約至秋成令息石以二斗而歸
之且禁粟毋得出境獲全者衆民甚德之而他縣多孳
餓云政爲一省之最罹母憂去服闋部使者以文學政
事薦陞禮部主事歷刑部郎中卒裳有學識多所著述

其論社所以主石之義曰社祭土主陰氣也夫陽氣積而成天故其精爲星陰氣積而成地故其精爲石石擊則星出陰動生陽也星隕則化石陽變爲陰也土爲陰氣之積而石乃其精故社以石爲主也時稱其善論他詩文亦多可採者有黃郎中集十卷

用廣州志政和志黃郎中集參修

黎秉繩字宗冕番禺人中鄉舉爲柳州訓導性質直能自守教授林幹嗜酒數諫止之竟以醉死秉繩具棺斂得幹遺金書囊中候其子至而付之子願酬以半堅辭不受丁外艱執喪盡禮服闋陞惠安伯教諭惠安迺太皇太后之兄秉繩以師道自尊而惠安亦克盡弟子禮惠安卒秉繩爲治喪斂祭一遵家禮屏去浮屠以疏請上

允之時公侯之家多尙侈靡咸歎以爲古禮之復見於今日也工詩文有集傳於家時承南園詩社之後廣人多工詩秉紼與族叔本寧瑾輩暨周斷事溥敬曾知縣惟忠儒士潘翥胡悌梁棗涂俊楊肇初皆有名於時繼之者則趙不易何濬輩也東莞時有鳳岡詩社則陳靖吉何潛淵羅泰爲之宗皆力欲追唐而力不逮其流甚靡後江門詩法旣傳始翕然從之而學之不至者大率傲睨乾坤霸柄雪月往往高虛而累性情於此見詩之難也

用廣州志文翰
類選大成參修

廣州人物傳卷第十三

廣州人物傳卷第十四

嶺南遺書

香山黃佐才伯撰

禮部左侍郎陳公

璉

按察使周公

新

知府翟公

溥福

副都御史羅公

亨信

知縣蕭公

嘉祐

府同知陳公

諤

監察御史王公

子倫

陳璉字廷器東莞人自幼聰敏喜學從黃勣受書經領洪武庚午鄉薦入太學選爲桂林府學教授嚴條約以身

廣州人物傳卷第十四

先之時有詔武臣子弟皆受學璉日進諸生講聖賢之道所謂忠孝仁義之說必使身體而力行之諸生雖文武不同莫不皆有所得都督韓觀總兵鎮守廣西猛悍不下士聞璉之教心悅誠服每以儒師加禮焉秩滿陞國子助教永樂初近臣言璉有治才不宜置之散地召試在優等擢知許州始至人以儒者易之少有警發衆爲悚懼乃更以寬厚寧民俗多淫祀戒諭之民遂更俗未幾代還改滁州均徭役時征斂禁奸戢暴民用大和太宗皇帝巡幸北京所過先遣廷臣察吏治問民隱治有異效者加陞擢焉衆皆言璉績最滁人恐失之詣闕乞留遂陞揚州知府掌滁州事賜綺衣一襲鈔五百貫

禮部宴餞給驛還在滁州又九年陞四川按察使四川去京遠民不畏法豪吏黠胥奸弊百出璉至一治以法不少貸軍中暴橫有號虎彪太歲者人莫敢犯犯輒受奇禍廉得其實爲設方畧密遣人捕之皆寘之重典而人以寧乃建言修武備慎刑罰明禮制復義倉正風俗等九事上嘉納之召還改南京通政使出納命令罔不明允上喜其盡職賜之誥命以示褒而大父父皆贈如其官妣與妻皆淑人俾專掌國子監事師道尊嚴善於訓迪士類悅之丁內艱正統初起復調南京禮部左侍郎於稽古禮文之事尤惓惓不少懈又五年以年踰七十乞致仕上許焉璉德行淳懿文詞典重人愛之若拱

璧其所進於上有巡符頌平胡頌鐃歌鼓吹天下傳誦
之縉紳士大夫求碑銘序記詩賦諸作以發德述懷娛
情寫物者足相躡於門應之如響故所作最多今傳者
有琴軒集歸田稿若干卷尤好著書凡所臨郡邑必采
其山川人事風俗物產所以供賦稅之正而適上下之
宜者爲書以傳若潁川永陽羅浮成都等志皆具存其
識鑑精明取舍不妄賓興之歲必在主司之列而收得
人之譽及致仕而歸郡縣守令暨鄉之學者考德問業
無虛日黃蕭養作亂其所以制禦綏靖卒保無恙者璉
之策爲多卒年八十五初去滁時滁人侑之於醉翁亭
與歐陽修王禹偁爲三賢祠後東莞縣知縣吳中祠之

與李用李春叟並亦曰三賢郡學則列於仰高祠

用王真所

撰墓誌銘廣州志一統志參修

贊曰一統志稱璉孝友和厚博通經史以文學知名于時及得其集而閱之斤乎其明渾乎其肅括平平乎如轡神駿馳輕輶於康莊之塗也信有德者之言哉晉江林誌有聲翰林嘗同事會試場屋與之論經史無挂漏者遂師事之語人每曰當今司馬君實又曰人中麟鳳也其感人如此其所操存可知矣家有萬卷堂所儲多祕府所無者四方學士求觀必館穀焉後皆爲官府奪去其同考會試者二皆在爲知州時國初之制蓋如此周志新字日新受知於太宗文皇帝嘗呼之爲周新因改

焉而以志新爲字世爲南海人居南郭外之高第里己卯鄉貢進士筮仕大理寺評事以剛直著讞獄平允莫有稱屈在列咸推遜焉每有疑獄必決之新新一言而白永樂甲申拜監察御史彈劾不避權要敢直言雖屢犯天威言愈懇切不少變貴戚皆畏之目爲冷面寒鐵人因稱新曰冷面寒鐵公京師中或怖小兒輒曰冷面寒鐵公來皆匿擢雲南按察使未赴有旨改浙江有冤民淹繫聞之喜曰冷面寒鐵公來也吾無患矣及至洗其冤放之自是異政日著一日視篆忽旋風吹異葉至前左右言城中無此木獨一僧寺有之去城差遠新悟曰此必僧寺殺人埋其下也冤魂告我矣發之得婦人

屍歟服加刑人稱爲神明一巨商遠回未抵家而日暮恐孤行爲人所圖潛以其貲置一祠后下至家妻問之告以故明日求之無有也往訴之新新曰是必而妻有外遇也覈之果然蓋歸語妻時樓之者竊聽先往取之矣遂併治之有訴爭兩傘者甲曰我傘也乙曰我傘也彼奪之所言記驗皆同新命剖之各持其半去陰遣人尾其後甲曰我始欲助汝傘價之半得非汝利也乙答曰傘本我物寧能低價屬汝於是甲就縛正其罪其燭奸類此境中有虎害爲文告城隍須臾得虎格殺之初往浙道上蠅蚋迎馬而聚尾之見一暴尸惟一鑰及小木私記在收之及至任令人市布比印誌不同者輒發

還無何得相同者鞠之乃劫布商賊也悉以其贓召布商家給之家人大驚始知其死於賊也它如辦豆獲盜人皆服之其除暴類此嘗巡屬縣微服觸縣官收繫獄中與囚語遂知一縣疾苦明日往迓乃自獄出縣官恐懼伏謝竟以罪去由是諸郡邑吏聞風股栗莫敢恣肆錢唐知縣葉宗行號廉能嘗偵之入其居無長物惟笠澤魚腊一束其家所寄者也袖少許以出明日召飲出示葉葉益砥礪號錢唐一葉清後卒於任爲文躬祭之哭甚哀其旌別淑慝類此寮案一日饋以鵝炙命懸之後有遺者指示之無復有以毫髮干者其寮案或受於人必問冷面寒鐵公知否新未顯時配夫人治褥以給

及在浙清苦如平時同官私屬內燕荆釵布裙以往大
類田野婦各相慚慙更爲澹素其廉介類此故當是時
周憲使之名震天下其所剖斷人視以爲法然爲政尙
大體以愛民爲本澤及無告民自不冤雖三尺童子皆
頌其美至於犴圜皆空浙民至今猶能道其事縷縷初
錦衣衛指揮紀綱用事使千戶往浙緝事多作威福受
吏賕新時齎文冊如京師遇諸涿州捕繫之千戶脫走
訴於綱綱乃更誣奏新專擅生殺上怒令馳馬逮新承
綱意者榜掠之無完膚旣至伏丹陛前猶抗聲陳其罪
不已且曰按察司行事與在內都察院同陛下所詔也
臣奉詔以擒奸惡奈何罪臣臣死且不憾上愈怒命戮

之臨刑時大呼曰生爲直臣死當作直鬼上尋悟其冤
顧侍臣曰周新何許人對曰廣東上歎曰廣東有此好
人稱枉者再後紀綱以罪誅事益白仁廟尤悼惜之新
爲人姿幹魁梧好學能文章在子行氣宇凜若成人鯁
直稜厲人無犯者有小挫者必奮奮不平必直之乃已
在郡校同列有過輒面責無所容人以爲太甚每正色
曰責善朋友道苟阿諛胡取友爲有過者卽改恆恐新
知之蓋其養可知已旣不祿夫人獨挈遺衣及書數卷
歸廣貧居如洗然都御史楊信民巡撫時存問其家每
月周之以俸嘗語人周志新當代第一人吾黨所未及
也新無子景泰初夫人卒於家浙人在廣東藩臬者皆

會葬云

用彭森所撰傳水東日記廣州志松江志參修

贊曰嗚呼新之死於紀綱也可哀也哉律身之廉臨政之明洗冤澤物之仁與夫持風裁臨患難之直而不撓可謂剛且大者語曰直木先伐又曰物忌芳潔其新之謂歟同里彭森傳其行曰公發姦擿伏有廣漢風而宋有鐵面御史公似過之擬人於其倫矣又曰被刑之夕司天奏文星墜上以是悔自後見一人衣紅立日中呵之問爲誰曰臣周新也上帝以臣剛直命爲城隍爲陛下治奸臣貪吏言已不見天顏慙然嗚呼豈其然乎豈亦鄭伯有魏元徽之比乎近世劉球毛吉爲奸盜所殺嘗附魂於人傳者亦著其說夫何疑於新乎要之新之

清風勁節固不待於此而自可傳於不泯也

翟溥福字本德東莞人永樂甲申進士筮仕知青陽縣青陽地僻民稀因其土俗爲政一以恩禮爲本民甚戴之縣治近九華山麓多虎爲民患齋沐爲文檄告山神曰民罹虎患令之過也禍於吾民寧禍於令身三日卽殲巨虎一境敕寧邑人勒碑頌之移知新淦田里廣而政繁俗喜訟能推誠布公教民禮讓德政尤著秩滿監司以最聞陞刑部主事用法平恕進本部員外郎平反多愜公論尙書魏源薦其有牧民材出爲南康府知府至則訪民情揀疾苦省刑罰禁橫征先是郡值歲歉民有擅取富室穀粟及收漂流官木者百餘人前守論以强

盜悉寘重典溥福盡杖而遣之闔郡服其明封壤瀕海
舟楫苦風濤無棲泊所遂捐俸築石隄延袤百餘丈舟
人稱便後共立廟祀於隄頭政暇遊廬山見白鹿洞書
院遺址經元兵火蕩爲瓦礫喟然興歎以爲政本在是
力捐俸率郡邑之尙義者重鼎建之創大成殿明倫堂
東西二齋貫道門三賢祠文會堂并號房十數所皆輪
奐燦然延致仕何博士爲師簡民間俊秀子弟受業其
中會朔望親臨爲生徒講解老穉觀聽者動以百計自
是郡民皆知慕學白鹿洞志稱其興復之功爲當代冠
冕云考績赴部以老疾辭侍郎趙新嘗巡撫江右知其
爲人甚詳厲聲曰翟溥福江西第一郡守也豈宜遽退

懇乞累日始得謝事別郡之日父老以其清貧爭持白金餞送溥福力辭不受皆挽舟涕泣不忍舍因留帶立廟於郡奉祀焉又配饗於白鹿書院之三賢祠三賢者唐李渤宋濂溪晦庵也後弁視賢守號六老堂年六十六卽投老歸杜門却掃惟觀書教子孫講誦而已足跡不到公府口不言有司政令居官三十餘年俸祿盡捐以營公務故家居田宅絕無所增平生廉謹剛介始終一節庭逕蕭然清貧自甘年七十一卒於家鄉人祀之邑學崇賢祠自號慎庵有慎庵集藏於家子慎謙俱任

教諭

用東莞志廣
州志參修

贊曰儒生擅文墨而忽公務俗吏事簿書而急操切迂

且驚之過也驚則瑣瑣條貫於風化罔所裨迂則惕玩
覬望而下緣爲奸夫條貫之稽而風化之遺弊端莫究
而奸利緣起此守令所以難其人而民受菑也秉公廉
則不驚任禮教則不迂若翟溥福者得之矣入國朝東
莞號多賢而鄉評謂溥福爲最驗諸厥施信哉

羅亨信字用實東莞人自幼穎敏好學年十二喪其母卽
能刻苦立志攻舉子業永樂癸未舉於鄉明年登進士
第改翰林庶吉士其年授工科給事中往浙江視水災
奏蠲嘉興海鹽崇德三縣稅糧凡五十餘萬石民賴以
甦丁繼母憂起復調吏科尋陞右給事中適小臣註誤
連坐謫交趾胥吏九載素位而行不以荒遠有無聊之

歎因自號安素洪熙改元用太子洗馬張瑛薦起拜監察御史嘗往通州察倉庫之弊誅民之尤無良者數人道路肅然巡按真定等府清軍山西所至有聲宣德中楮幣壅不行授敕權京師商賈漸以通用再丁繼母憂命馳驛奔喪卽起復大臣有言亨信堪任方面者詔復舊任食按察司僉事俸仍治鈔法宣德乙卯陞右僉都御史命往平涼等處練兵以備邊塞殫心力夙夜不懈上念邊境苦寒璽書慰諭且賜幣以爲衣益感奮正統丙辰與都督趙安率洮岷等衛兵巡邊遇虜安與都督蔣貴用都指揮安敬議逗撓不行亨信至其營斥之曰汝輩受國厚恩臨敵退縮安用汝握重兵爲且汝特畏

死耳死三尺法孰若死敵貴等色變以糧芻不繼爲解
卽上章劾貴等老師玩寇敬怯懦不忠侵尅軍餉上命
兵部尙書王驥往詢皆如言蔣貴輩取伏誅狀斬敬徇
於師自是將士股栗用命統兵四出獲虜酋俘斬無筭
迤西以寧奏捷陞俸一級賚以文綺白金先是聞父喪
請歸守制上以邊務方殷奪情視事至是始命馳驛歸
葬往返皆賜楮幣千緡奉敕巡撫大同宣撫總督屯種
給贍軍餉興利除害爲久安計每歲初秋回京議事條
奏汰冗官省虛費積邊儲禁私役又言殘虜入貢迎送
稠疊當節之以紓民力又言各衛土城宜修築以絕北
虜窺覘朝廷皆行之又言虜酋也先專俟覺端圖爲入

寇宜預於直北要害增置城衛備之不然恐貽大患議者以軍伍不敷獨寢不行卒有土木之難人以爲知微云時參將石亨暨大同推官上言欲以大同四州七縣之民三丁取一爲兵又有敕令軍餘盡撥屯種量畝起科亨信奏言北虜方驕邊民疲甚加以邊地饑薄若如所言是絕其衣食而逼其逃竄也且當今事勢正宜布恩信以結人心苟絕其衣食未有得其心者從之戊辰冬進通議大夫右副都御史給誥命祖考皆賜恩己巳秋轉左副都御史賚文綺白金有加會也先入寇獨石馬營龍門雲州懷來永寧諸城堡降所至州縣文武官皆遁英廟方北狩人心洶洶亨信時在宣府孤城危甚

當國者建議趣召宣府總戎官率兵入衛京師或欲遂
棄其城衆紛然爭就道亨信乃毅然仗劍坐當門拒之
且下令曰敢有出城者手斬之衆遂定城中老穉歡呼
曰吾屬生矣因設策捍禦虜不敢南人莫不多其功歲
庚午以年逾七十上章致仕會報宦官喜寧偕虜詣城
下議和密遣驍將楊俊伏兵擒之虜患乃息上賜璽書
有爲國除患之褒復有文綺白金之賜不侔所請是秋
回京陛見辭益力因免冠叩首上察之見其著兜鍪處
顛髮皆盡乃許焉致仕八年卒年八十有一所著有覺
非集子泰能詩官承事郎

用黃結所撰行狀袁衷所
撰墓誌瓊臺吟稿參修

贊曰土木之變社稷阽危宣府鎮節苟移犬羊必乘閒

深入天下未可知也世謂亨信有安社稷功朝廷當從厚典而僅循常例有遺憾焉雖然人臣事君內思盡志盡志謂之忠外思盡職盡職謂之功亨信亦惟盡其爲臣者耳而奚靳於報也哉

蕭嘉祐者新會人也將赴舉於禮部疏坡黎貞作構室說以贈之其略曰善營室者必先蓄材擇匠羣材蓄則百工足用而所需協其情匠氏良則規矩一定而無更張之擾古之君子大過人者無他焉不輕用其才積之有素如泉之有本蓋其發之也遲故其資之也深守之也確故其得之也豐猶作室者具百材之用得匠氏之良而收美觀之效也今吾子以穎悟卓越之才弱冠掇危

科人孰不爭先快覩而致譽於吾子而吾斷斷乎以未足爲說者何也知其人所以責備其人也嘉祐再拜受教自是益力學養銳堅忍其志以縱橫自用爲終身戒後嘉祐任廣西恭城縣知縣處事公平待人以信大得民心雖山谷犵獠以片紙招之聞風而至無敢後期者政暇與諸生講學士風大振後卒於官民作祠以祀之世稱貞爲知人而賢嘉祐之能奉以周旋也又同邑茹連者初爲齊府奉祠副改四川江安縣丞超陞刑部山西司員外郎再遷湖廣長沙知府連身長大帶圍六尺一飯米數升豕首一枚然皆仰給於公廩之人不苟取於民嚴於律令不受私託有爲縣令客京邸與連同鄉

里連往訪之爲設酒饌在坐相談謔誇其器用之美連
艷然怒曰君非盜於民何以得此拂衣起袖金杯而去
云吾將聞於上衆恐怖失色莫知所爲一日因奏對上
憫其老令致仕連不肯去對曰臣日食米肉若干臣去
官無以自飽連同鄉一時仕者幾人連獨有廉聲至於
今猶未絕於人之口又云連守長沙時命抄某王府私
取其金龜藏之連平生所得惟此而已然則連以廉見
稱於其鄉豈一時無人耶考之舊志如馬晞驥却端溪
之一硯曰吾當飲水自勵何敢以長物汚家聲連猶有

慚德云

川新會志一
統志參修

陳諤字克忠番禺人永樂戊子領鄉薦卒業太學庚寅五

月卽拜刑科給事中遇事剛果彈劾不避權要嘗奏事
聲響甚大聽者悚然上令餓之數日奏對如前乃曰是
天生也每見呼爲大聲秀才云嘗以直諫觸上赫怒命
爲坎奉天門外瘞之露其首七日不死遂釋還職尋陞
吏科都給事中一日率同列奏事忤旨上令落職罰使
修葺象房同事者先畢功降職去謬貧不能倩人乃躬
自爲之值駕至觀象問治屋者誰也謬前俯伏陳其故
上念謬慙直且憫其貧尋命復官由是擊搏愈甚朝廷
震肅上自此深見付託矣辛卯九月奉使雲南癸巳三
月還朝卽命署通政使司事逾年署應天府未幾又署
刑部事所至凡百張弛悉中肯綮丙申夏又轉鴻臚寺

亦署事也明年冬又改署工部事聲績視前有加署事
凡四年陞授順天府府尹政尙嚴明有漢張趙風嘗出
行轉城隅誤衝皇太子駕太子以聞上曰陳府尹是我
父母官竟不問其見重如此己亥四月癸巳有烏乳於
庭樹諤表獻之上喜賜金帛廷臣稱賀時有白烏之頌
頃之出爲湖廣按察使時以爲烏臺外補之兆非但國
之禎也歷官三載無冤獄前官累督營造未成諤規畫
之民不勞而事集將代吏部侍郎師達有事湖廣留之
督軍令於衆曰擾民者斬民賴以安奏績改任山西以
事忤親王貶知浙江海鹽縣洪熙改元正月封建親藩
選輔導之職廷臣推諤重厚老成才德兼備可用會上

一日問左右曰大聲官人何在此人宜爲輔導使人得
易聞過至是起爲荆府長史匡拔多所裨益能副上付
託之重蒙賜忠良鯁直四大字以寵異之宣德戊申丁
母憂歸郡人素服其公直有屈者多訟之謬謬語諸當
道皆伸之服闋復爲長史與王不協遂除鎮江府同知
時戶部侍郎周忱督漕於淮檄之修陂塘圩岸相方設
宜隨事就緒及郡之山川社稷壇壝學校齋堂殿廡咸
大而新之皆有成績未滿考以老乞歸不許欲徑掛冠
鎮民遮留不得行及章屢上乃允有旨命兵部撥夫隸
送還家居兩期爲正統甲子以疾卒年六十有八謬爲
人剛介然賦性恢譎當被瘞時歎息謂其人曰吾今夕

乃爲大斃所苦請其故則罵之曰叱嗟汝不知耶朝廷
瘞人當以穽令速死耳瘞者如其言遂得屈伸不死中
貴人阮巨隊奉命來廣索虎豹從阮飲乞虎皮以歸明
日草奏具言阮多用鮮肥者以待賓從貢瘠虎使斃於
道路復勞百姓阮見之大恐置酒爲謝諤旣酣乃從容
謂曰聞子非閩者近娶妾果然否阮請閱諸室諤遍視
羣罐知其金珠也問爲何物曰酒卽使人扛去笑曰吾
故來索美醞爾阮祈哀得留其半廣人至今傳以爲談
謔

用陳氏家傳名臣宛
琰錄廣州志參修

王子倫名綱以字行南海人也有文名宣德初監察御史
何善薦授長沙之攸縣丞惠政及民民愛之時草寇蕭

彥真剽掠子倫與百戶張本捕之抵衡山遇寇與戰失利中有引弓向子倫者衆呼曰王父母君子人勿傷遂得免旣而通政使陳璉復以有守有爲薦知江陰縣廉名益著僅初考都御史陳智聞其有學識且操守廉介復疏奏舉之有旨來徵邑民黃惇素等千餘人遮道願留不可乃脫其靴懸於譙門以示不忘至京授河南道監察御史熒然以直聲著歷官始終不攜妻子正統間巡按雲南遂以疾卒吏部尙書魏驥志其墓稱爲廉能吏賢法司云二子載貫載能文章隱居不仕貫有詩名由鄉貢任南平知縣載子觀光亦舉人能詩而子倫所著有彞齋集余按永樂宣德間吾廣仕宦有聲者不獨

子倫有李晟易善龔遂程勉湯性方鍾順胡濟羅密李晟字孟昭鄉貢進士任都給事中以廉能擢知南寧府專尙德教夷俚悉供賦稅陞河南布政司參政所至有惠政致仕家居尤篤孝友易善亦鄉貢進士任給事中陞岳州府知府政尙寬厚決訟明察凡案牘一目洞然吏不敢欺稱爲神明陞湖廣布政使景泰中引年卒於家湖廣人仕廣者至今存問之龔遂永樂辛丑進士任監察御史知柳州府性廉潔致仕日攜數十簾歸賊追劫之啟鑰則皆書籍也鍾順字必華由鄉舉知沔陽州江西凶人周禮洪能起大獄爲州人害順杖殺之一郡肅然鄰郡監利縣民越境而訟者凡百有七十人受而

聽之咸得其情監利民大悅爲立生祠終於廣西太平
知府程勉任江西理問廉介勤慎決獄無私擢監察御
史後丁內艱哀毀而卒湯性方歷刑部主事郎中陝西
按察副使以剛毅果決知名皆發身鄉貢者胡濟字孟
時洪熙初元御史胡啓先以賢良舉授廣西布政司檢
校正統中知理定縣調平南有築城功後從征大藤峽
爲民辯寃得活者二十餘人世稱其循良廉介羅密任
武進主簿善撫字嘗遇歲歉賑濟有法民賴以全活督
運糧餉如京師舟爲風所漂沒罄已貲以償之卒於官
民弔奠如市留葬不克乃留衣冠葬焉禮部尙書胡濙
躬爲之斂惋惜連日贊其像云自古至今有兩桐鄉蓋

紀其實也自晟而下多南海人獨遂與密家番禺云

用廣

州志順德
志參修

廣州人物傳卷第十四